

贊曰：王莽始起外戚，折節力行，以要名譽，宗族稱孝，師友歸仁。及其居位輔政，成、哀之際，勤勞國家，直道而行，動見稱述。豈所謂「在家必聞，在國必聞」，「色取仁而行違」者邪？^(一) 莽既不仁而有佞邪之材，又乘四父歷世之權，遭漢中微，國統三絕，而太后壽考為之宗主，故得肆其姦慝，以成篡盜之禍。^(二) 推是言之，亦天時，非人力之教矣。及其竊位南面，處非所據，顛覆之勢險於桀紂，而莽晏然自以黃、虞復出也。乃始恣睢，奮其威詐，^(三) 滔天虐民，窮凶極惡，^(四) 毒流諸夏，亂延蠻貉，猶未足逞其欲焉。是以四海之內，翬然喪其樂生之心，^(五) 中外憤怨，遠近俱發，城池不守，支體分裂，遂令天下城邑為虛，^(六) 丘壠發掘，害徧生民，辜及朽骨，自書傳所載亂臣賊子無道之人，考其禍敗，未有如莽之甚者也。昔秦燔詩書以立私議，莽誦六藝以文姦言，^(七) 同歸殊塗，俱用滅亡，皆忤龍絕氣，非命之運，^(八) 紫色黷聲，餘分閏位，^(九) 聖王之驅除云爾！^(一〇)

學、注

- (一) 師古曰：「論語載孔子對子張之言也。不仁之人假仁者之色，而所行則違之。朋黨比周，故能在家在國皆有名譽。故贊引之。」
- (二) 師古曰：「肆，放也，極也。」
- (三) 師古曰：「睢，音呼季反。」

- (四) 師古曰：「滔，漫也。」
- (五) 師古曰：「翬然，衆口愁貌也。音五高反。」
- (六) 師古曰：「虛，讀曰墟。」
- (七) 師古曰：「以六經之事文飾姦言。」
- (八) 服虔曰：「易曰：『亢龍有悔』，謂無德而居高位也。」蘇林曰：「非命，非天命之命也。」
- (九) 應劭曰：「紫，間色，羈邪者也。」服虔曰：「言莽不得正王之命，如歲月之餘分為閏也。」師古曰：「羈者，樂之淫聲，非正曲也。近之學者，便謂羈之鳴，已失其義。又欲改此羈聲為蠅聲，引詩：『匪雛則鳴，蒼蠅之聲』，尤穿鑿矣。」
- (一〇) 蘇林曰：「聖王，光武也。為光武驅除也。」師古曰：「言驅逐蠲除，以待聖人也。」

校勘記

- 四一五頁三行 莽遣昭君兄子和親侯王歙誘呼(當)當至塞下，景祐、殿、局本都作「當」，此誤。
- 四一六頁三行 予將(新)(親)築焉。景祐、殿本都作「親」。王先謙說作「親」是。
- 四一七頁二行 波音(邊)(彼)皮反。景祐、殿本都作「彼」，此誤。
- 四一七頁二行 平原女子遲昭平能說(經博)(博經)以八投，王念孫說，「經博」當為「博經」，故服注云「博奕經，以八箭投之」。
- 四一八頁二行 識讀與幟同音(忒)(式)志反。景祐、殿本都作「式」。